

19-10止

蜀中名勝記卷之二十七


順慶府一南充縣附郭

閬中曹學佺能始者

嘉陵江既適當郡流則將滙巴宕之水而下樊江矣
華陽國志云鈞璋分墊江以上為巴西郡者此也蓋
字記云嘉陵江在州東二百步自相如縣界流入南
充按十道記云果州左漢西漢水叢薄蔚然有相如
亭臺觀此則嘉陵江之為西漢水疑明矣 章應勳
遊嘉陵江水寄深上人詩水性自天瀉石中本無聲
如何兩相激電轉空山驚按長慶志云韋貫之坐考

嘉慶二十二年二月

土岐文庫
文庫17
W216
10



文庫 17
W216
10



蜀中名勝記卷之二十七

閩中曹學佺能始著

順慶府一

南充縣附郭

嘉陵江既遠當郡流則將滙巴岩之水而下墊江矣
華陽國志云劉璋分墊江以上為巴西郡者此也寰
宇記云嘉陵江在州東二百步自相如縣界流入南
充按十道記云果州左濱西漢水叢薄蔚然有相如
琴臺觀此則嘉陵江之為西漢水益明矣 韋應物
聽嘉陵江水寄深上人詩水性自云靜石中本無聲
如何兩相激電轉空山驚按長慶集云韋貫之坐考

蜀中名勝記

卷二十七

七

昭和六年二月一日贈
未校書館寄

010185186151

策收直言者出爲果州刺史今嘉陵驛設于此者
舊錄云自漢紀信以下三十六人並見學錄蒲士龍
所編者舊而趙嗣業趙昌藻游問爲之贊此外隱逸
王公宇以下十四人併繪像于郡之鄉賢堂又復搜
訪王綰以下二十餘士悉繫于左 郡志云譙周墓
在治後有碑今折 碑目云唐王維送楊長史赴果
州詩刻在郡治其中聯云官橋祭酒客山木女郎祠
唐詩三體註云漢法祭酒上客之稱女郎祠以謝自
然上昇于果山按常璩云張魯以鬼道立教後乃爲
祭酒巴漢夷民多便之則祭酒稱上客是矣謝自然

昇仙乃貞元間事在右丞後不應引此官橋者志云
郡西三十五里有西橋舊名官橋也按女郎亦張魯
女感孕而生龍者祠在漢中 碑目又云唐移縣碑
在南充縣門大中年立文字磨滅不可詳辨二良牧
碑馬肩孟撰載唐二刺史事碑在郡治醋庫之側永
興節度使王彥超重建行成思堂石刻詩不著其姓
今附見云作堂在姑孰把麾來果山男子四方志萬
里如目前振振佳公子性行純如天旣知仁有本自
應枝葉繁宣尼語參孝推廣十八篇君能擴充之九
思極其全道行身亦立揚名顯其先回觀廬墓人卑

蜀中名勝記 卷二十一
卑何足言方輿記云有仙鶴樓在郡城後子城上下
瞰大江宋邵博詩春去秋來好風月鶴樓端勝庾公
樓 郡之東南有開漢樓郡守楊濟記云聖朝褒綸
有實開漢業之語因摘二字以名是樓按開漢樓詩
序嘉陵大江襟帶於左金泉栖樂諸山雄峙于右宋
忠祐廟誥詞云以忠殉國代君任患實開漢業使後
世知君爲重身爲輕雖糜捐不避者侯有力焉之謂
也 有清居山勝覽云在南充縣南唐姚昂詩天設
兩峰南北峭地盤一水古今流內有四亭曰白雲光
相吸江五友按五友亭宋游炳題明月清風爲道友

古典今文爲義友孤雲野鶴爲自在友怪石流水爲
娛樂友山果芋栗爲相保友是五友者無須與不在
此間也總志云金樓在清居山高與山等亭亭如浮
圖常有光焰出焉 有清居山方輿云城南十里有
古刹下瞰龍門諸山寰宇記云龍城山盤屈如龍絕
壁如城蜀志補遺卽龍角山道經以爲福地 有朱
鳳山寰宇記在州南十里高百七十二丈周迴二十
里昔有鳳凰集于此因置鳳山觀方輿云乃爾朱仙
李淳風養煉之地迴視郡城如在掌握碑目云唐朱
鳳山觀銘長史袁玘文 有漢充國城志云在府南

三十五里按充國漢永元二年分閬中置巴記曰初平四年復分爲南充國也邵博詩云山圍翠合水連雲萬室樓臺照眼明勝地風淳真樂國四州惟說好充城 有畫卦石志云在治東四十里其石平如砥上有八卦相傳周柱下史以足畫之足跡尙存 有大斗溪志云在治東八十里源出老君山與嘉陵江合旁有大石如斗 有都尉壩嘉陵志郡南五十里有都尉墓俗云都尉娘西充女子也代父戍以功授都尉歸爲嫂氏所嘲乃剖腹見肝腎以死葬鳳了山有豐碑社祀今廢其年代姓氏無攷墓前翁仲猶存

或云卽陳壽妻壽嘗爲騎都尉故人以稱其妻 西北有果山寰宇記在州西八里層峰秀起松柏生焉方輿云果山郡柑以得名陳壽隱居于此有祠志云陳壽有萬卷樓在山之麓邵伯温果山卽事詩果山仙果秀天香處處圓金樹樹芳謂黃柑也志云果山書院在城北五里蜀譙周建後郡人邊速達以秘書監致仕歸隱于此藏書四千二百七十一冊碑刻爲至正八年 又云治北五里有譙周觀星臺一云是其故宅有碑存按華陽國志云譙侯修文于前陳君煥炳于後則此山之靈秀有自來矣 有金泉山方輿

蜀中名勝記 卷二十一
云在城西果山之足唐書貞元十年謝真人名自然
于縣界金泉紫極觀白日上昇郡郭是夕有虹霓雲
氣萬目所共覩焉有青霞觀及真人祠韓愈詩果州
南充縣寒女謝自然童騃無所識但聞有神仙輕生
學其術乃在金泉山一朝坐空室雲霧生其間須臾
自輕舉飄若風中煙入門無所見冠屣同蛻蟬施肩
吾謝自然昇仙詩分明得道謝自然古來漫說尸解
仙如花年少一女子身騎白鶴遊青天有步虛臺宋
鄭芳庭詩云平生酷好退之詩謝女仙踪頗自疑不
到步虛臺下看瓊笙玉佩有誰知有靈泉院碑目云

謝真人父諱寰所居名謝寰山山有院名靈泉一唐
碑字多訛缺通志云靈泉卽金泉也唐李淳風于此
藏金化爲泉宋江萬里書金泉二字于崖上碑目云
唐金泉山仙居述太和五年果州刺史韋公肅文唐
鄭餘慶詩刻唐誥刻僞蜀刺史徐光溥詩刻俱在金
泉山李宏遊金泉觀詩云昔時謝女昇天處此日遺
蹤尙宛然蟬蛻舊衣留石室龍飛勝地湧金泉碑書
故事封蒼蘚殿寫真容鑲翠煙薄暮松巔聽鶴唳猶
疑彷彿下神仙 有寶臺山在城西與金泉對峙有
覽秀亭呂好問覽秀亭記思史實之遺風弔譙陳之

舊蹟想程謝之仙踪慕張閻之英躅謂史謙恕竇泌
譙周陳壽程太虛謝自然張嶷閻纘也 有舞鳳山
志云西北八里舞鳳山三字乃宋人隸刻石 有栖
樂山志云在西十里相傳謝自然昇天之日仙樂振
響峰頂故名有栖樂池在山頂瑩之以石泉水清潔
與嘉陵江相通 有安漢城志云在府城北三十五
里漢地里志云有魚池在南莽曰安新 劉宋于此
置宕渠郡又云宕渠城在府城北四十里卽石苟壩
城也 有大方山方輿云城北十五里通志云城西
三十里又有小方山一峰萬嶺儼若洞天其上有滴

乳泉道士何志全飲此水年老面如桃紅樊汝賢詩
雲液落山腹脈與崑崙通云何山中叟八十桃顏紅
卽今之乳泉舖也 有昆井益州記云南充縣西六
十里有大昆井卽古之鹽井 有大眈山與小眈山
相對志云西百里大眈山隋楊昉修道于此因名
名賢馬鬣有晉譙秀墓按秀譙周之孫隱居不仕躬
耕山藪李雄徵之不應晉王逸少書云聞譙周有孫
其人高尚不仕可得見否唐李商隱詩欲向巴西覓
譙秀巴西惟是有寒蕪 有馮休墓方輿云南充人
眞宗朝不應辟召歸山著書 有何涉墓志云在琉

璃山下按涉讀書博古著作甚富明道雜志載其爲
司馬溫公所推重 有游仲鴻墓後漢劉光祖表其
道曰於乎慶元黨人游公之墓 有趙夫子墓在據
德里鄉人稱趙巽也 予遍閱唐人集元稹嘉陵江
詩秦人惟識秦中水長想吳江與蜀江今日嘉川驛
樓下可憐明練繞明窗其二云千里嘉陵江水深何
年重繞此江行只應添得清宵夢時見滿江秋月明
微之又宿嘉陵驛詩嘉陵驛上空牀客一夜嘉陵江
水聲仍對牆南滿山樹野花撩亂月櫳明其二云牆
外花枝壓短牆月明還照半張牀無人會得此時意

一夜獨眠西畔廊白居易嘉陵夜有懷詩露濕牆花
春意深西廊月上半牀陰憐君獨卧無言語惟我知
君此夜心其二云不明不暗朦朧月非暖非寒慢慢
風獨卧空牀好天氣平明閒事到心中武元衡題嘉
陵驛詩悠悠風旆繞山川山驛空濛雨似烟路半嘉
陵頭已白蜀門西更上青天歐陽詹聞嘉陵越鳥聲
呈林蘊詩正是閩中越鳥聲幾回留聽暗霑纓傷心
激念君深淺共有離鄉萬里情陸龜蒙宿嘉陵館樓
詩離思茫茫偏值夜每因風景却生愁今宵難作刀
州夢月色江聲共一樓李洞將之蜀別友人詩嘉陵

雨色清澹別酌參苓到蜀高諸岳窺天合四溟書來
應隔雪夢覺已無星若遇多吟友何妨勘竺經薛能
嘉陵驛詩江濤千疊閣千層銜尾相隨盡室登稠樹
蔽山聞杜宇午烟熏日食嘉陵頻題石上程多緩暫
歇泉邊起不能如此幸非名利切益州來日合携僧
劉滄春日遊嘉陵江詩獨泛扁舟映綠楊嘉陵江水
色蒼蒼行看芳草故鄉遠坐對落花春日長曲岍危
檣移渡影暮天栖鳥入山光今來誰識東歸意把酒
閒吟思洛陽右嘉陵水閬中廣元皆得稱之雖不知
所指然今驛設在果州故并及之

西充縣

始析南充後乃併流溪而有之仙踪古跡特著其大
陵鎮則有扶龍山志在高陽之扶龍村蓋紀信此縣
人祠在紫崖其小陵鎮則有肖巖石竇空澗泉水清
潔 唐盧藏用弔紀信文曰皇綱圯兮帝紐頽王風
悲兮霸道衰天運促兮周以覆秦德棄兮漢業開何
項王之最屢作驅除于雲雷豈淵海之飛盪資拔山
之偉才于是左契歸楚羣雄奉職皇矣漢祖獨負其
直矧滎陽之圍城兮旣孤而迫偉將軍之天誘兮矯
奪其識彼見危而授命兮亦各有時考振古以爲觀

蜀中名勝記 卷二十七
兮罔恢帝基感將軍之墳隧兮壯大義之在茲仰前
修以砥節顧車迴而馬遲嗚呼身旣焚兮業旣昌楚
歌絕兮漢道光君不旌兮史不揚功不錄兮歿不傷
奄孤墳以載葬抑千祀而爲荒皇周敷訓兮澤及枯
齒伊予寡德兮忝宰茲地奉宣嘉猷兮懼尸厥位思
將軍兮允忠且義託神交于萬古兮實獲心志乃斲
石于他山兮式幽墳以昭賁詞曰攝提貞歲兮奉揚
仁風跋涉草莽兮詞弔紀公善彼勇兮殺身爲忠九
原不作兮予將焉同金石刻名兮千萬歲魂魄光烈
兮爲鬼雄 南岷山則有九井十三峰漢何岷之所


隱也隋程太虛嘗修煉于此志云太虛自幼好道精
修勤苦隱居南岷山絕粒有二虎侍左右九井十三
峰皆其修煉處一夕大風雨砌下得碧玉印居人每
祈符祈年印以授之輒獲豐稔唐元和中解體後遷
神于元宮容貌不變宣宗命人求之使者過商山宿
逆旅躡險有居第如公館青童引見一道士自稱程
太虛祖居西充且囑曰明歲君自蜀入南岷山無忘
我及至蜀孰是畫像與前見者無異宋賜號道濟太
師碑目云唐程仙師蟬蛻偈皂莢碑唐仙林觀碑中
書侍郎趙彥照撰俱在本山之降真觀 流溪縣則

有鐵冠仙人鈐記云大洲連小洲此地出公侯 有漢車騎崖石刻郡國志云後漢車騎將軍馮緄于此鑄崖刻石十有餘處寰宇記云在流溪縣按金石錄云右漢車騎將軍馮緄碑以范曄後漢書攷之史云字鴻卿而碑云皇卿史云初舉孝廉七遷至廣漢屬國都尉拜御史中丞順帝末持節揚州諸軍事與中郎將滕撫擊破羣賊今據碑自舉孝廉至爲廣漢屬國都尉凡十一遷而爲中丞與都使徐揚二州討賊皆在爲都尉前碑云討賊時坐迫州縣正法而史不載又云爲隴西太守坐問吏辜旬不分去官以兇駭

動爲四府所表復家拜隴西太守而史但言遷隴西太守史云爲遼東太守徵拜京兆尹轉司隸校尉遷廷尉太常拜車騎將軍以碑考之緄爲遼東太守以前常爲治書侍御史遷尙書遂爲廷尉未嘗拜京兆尹及司隸也史云振旅還京師監軍使者張敞承宦者旨奏緄會長沙賊復起攻桂陽武陵緄以軍還盜賊復發策免而碑云臨當受封以謠言奏河內太守中常侍左悺弟坐遜位史云復拜廷尉時山陽太守單遷以罪繫獄緄拷致其死遷故車騎將軍超之弟中官相黨遂共誹章誣緄坐輸左校而碑云表荊州

刺史李隗南陽太守成晉太原太守劉瑱不宜以重論坐法作左校亦皆不合史又云爲河南尹時上言舊典中官子弟不得爲牧人職帝不納拜屯騎將軍復爲廷尉卒于官而碑云復廷尉奏中官子弟不宜典牧州郡獲過左右遜位永康元年薨亦當以碑爲正碑又云緄謚曰桓而史亦不載余嘗謂石刻當時所書其名字官爵不應差誤可信無疑至于善惡大節則當以史氏爲據今此傳首尾顛倒錯謬如此然則史之所載是非褒貶失其實者多矣果可盡信耶又云右漢馮使君墓闕銘云故尙書侍郎河南京

兆豫州刺史馮使君神道按後漢書馮緄父煥安帝時爲幽州刺史而緄碑亦云幽州君之元子此字在宕渠緄墓前雙石闕上知其爲煥闕也



蜀中名勝記卷之二十八

閩中曹學佺能始著

順慶府二

廣安州

治有秀屏樓霄漢閣皆顏魯公書擬峴亭南峰寺皆
 張商英詠 圖經云右倚秀屏左瞰渠水志云秀屏
 山昔有石土地像宋太祖以筆點此山立軍治其像
 因自墜今郡治卽石土地所在 通志張無盡題擬
 峴亭詩英雄往事堪歎息闌干徒倚情何極學取山
 公醉似泥不同羊祜謀人國又題南峰寺詩孤雲飛

遠岫落日滿平川寺據南山頂僧傳北祖禪碑目云大唐三聖碑睿宗御製文俱在州學內道德經碑在城北紫極觀唐咸通中州刺史陳壽立公府建置碑宋開寶三年張琪記乾德六年許允修創也州立于濃洄鎮濃洄二水名寰宇記云濃水出龍扶速山東流入渠江河水卽渠水縈洄爲潭者耳按唐地里志岳池有龍扶速山環水出焉非濃水也州志云濃水卽西溪水水色常不澄故曰濃發源距州治百二十里蓬州之綿塢流至橡樹壩二溪相合經龍扶速山下龍棲灘與環水合又至城南五里東折入渠

江與洄水合是龍扶速山乃三溪合流處非源也渠江有三十六灘水之灌輸其間者渦滄渠別莫知其幾中兩渠相距二尺廣深半之可受流觴天巧致然非人力疏鑿碑目云篆水在州東北五里渠江曲尺灘下石磧平坦冬月水涸磧露仲春水生磧沒深不盈尺日光照映金波透澈其年若登則紋宛成篆籀滌洄波面其見不常邦人以之卜歲云宋石刻故事以三月三日至河曲過渠江流杯大觀乾道淳熙紹興嘉定間知軍宇文能承務郎張廷堅德州參軍李陶姚彥遠何溫叔游伯畏何宋卿楊次皋安

康民各同時髦游賞其中有連游二三日者如崇慶
杜鵬舉奉親挈家來遊 有龍鏡潭水圓如鏡宋刻
龍鏡二字于石有琉璃淵兩水相映其一紫碧痕如
羅帶其一深清淵如琉璃俱在篆水左右 江中沱
磧有若鷓鴣若龜蛇若繫縲若張繖有如明月之團
圓有如神仙之遊戲皆以形似得名名賢韻士每過
其處爲之流連題詠唐元稹詩云渠江明淨峽逶迤
船到名灘拽筴遲櫓窾動搖妨作夢巴童指點笑吟
詩畚餘宿麥黃山腹日背殘花白水湄物色可憐心
莫恨此行都是獨行時宋張無盡詩濃洄江水瀉詩

灘中有神龍久屈蟠眾樂妙音時響亮雙娃長袖忽
闌珊世間變化無非幻閣上登臨正好歡觀幻見眞
眞亦幻谷花岩草謾凭欄何行中岩渠廣安駐泊記
南連巴徼北接通川複嶺東橫清江西下林深箐密
岩穴幽邃信爲奇觀也 其有姜山則以伯約屯兵
而名山有姜山寺唐僖宗時建下有飛泉二字僧可
徹書志云在州東二十里 晶然山則以晶然山龍
祠之神得名碑目云勅賜孚惠靈公廟碑在晶然山
有晉太康八年碑文志云在州東南四十里按安子
文有晶然集指此 子仙山則以神仙馮勝得名志

云馮緄有子修煉于岳門山一日辭父母謂當仙去以來晨白鶴飛翔爲候緄登此山望之已而果然又名望子山吳薦廣安志曰子仙觀在州治西二十里子仙山上五代時居人將軍馮勝之子修煉于此一日仙去將軍立堂數楹于得仙處則所謂將軍者馮勝也非漢車騎將軍馮緄也緄傳子鸞舉孝廉爲郎中並無得仙之事 鶴棲山則以謝自然得名碑目云鶴棲山在冀都鎮有古碑字雖漫滅尙髣髴可認其略云唐貞元十年歲在甲戌果州女子謝自然白日昇仙刺史李堅以狀聞又爲之傳于時先有雙鶴

棲宿此山然後飛迎自然駕之而去自是俗呼爲鶴棲山按自然昇仙在果州金泉山李堅上其事唐德宗賜詔今刻于金泉年月日與此碑所載不差通志云在州東之新明鎮西南十里 故宕渠城古之賓國都也晉中興書曰賓者廩君之苗裔巴氏之子務相乘土船而浮眾異之立爲廩君子孫布列于巴中秦并天下以爲黔中郡薄其賦稅人出錢四十巴人謂賦爲賓因名 大小良城石崖四絕天險之地宋史淳祐四年制置使余玠移渠州治于此已上二則志云俱在州東北五六十里 其爲名賢芳躅則有

孝義臺通志云唐陳子昂之後有遷居于此者七世同居唐旌表之宋時臺尚存 故縣鎮顏魯公碑碑目云舊傳邑宰有姓顏者魯公之先魯公之刺湖州也過道院因有碑銘今碑磨滅存命除湖州刺史顏真卿勒銘于道院凡十四字乾道中移置軍城 有張唐英墓志云在州西三十里按唐英新津人慶歷三年進士歷官殿中侍御史卒葬雙流之三株里紹聖三年其子庭玉徙居廣安改葬于岳門山東南峰下其弟商英往來常居于此山水名勝多所品題有安丙墓志云在州南五十里宋史吳曦僭叛丙矯

密詔誅之除四川安撫使 有張庭堅墓志云在州北宋史庭堅廣安人元祐進士爲右正言逾月數上封事訟司馬光呂公著之寃疏蔡京章惇之罪 有黎錞鄉志云渠江人任直講宋英宗以蜀士問歐陽修對曰文行蘇洵經術黎錞也

岳池縣

寰宇記云岳安山在縣東三十五里高六百丈岳池之水出焉上有音聲鳥也 唐何少卿讀書在龍穴山方輿云岳池之封山也去縣五里宋元豐間張諫議廷堅讀書在羊角竹洞志云北三十里梁天監中

有講道德經者感二牟跪聽故名慶歷間狀元蒲信
讀書在金隴山志云碑見存 碑目云龜山碑在岳
池縣東六十里鑿地得斷碑乃唐人經行所記又云
杜甫岷山寺詩刻在縣北三十里岷山上有象王獅
石左右龍洞書岩四景又云老君山舊碑載唐天祐
間有道士乘馬至此馬化爲石道士亦不見 其寺
名之佳者志云西三十里西溪源自舊縣流入平灘
有西溪寺 又云西二十里鴨山昔人見雙鴨飛入
山池化爲石因名上有鴨山寺唐乾元中建 又云
南二十里雲鈎寺唐貞觀建每晨有白雲鈎其棟宇

舊名毗盧也然予過縣西千佛崖古觀寺峻級長林
煙蘿下垂拂人車馬致可悅耳按畫苑以爲唐開元
僧元應鑄善額栖岩寺

渠縣

周書曰渠州言鳳凰降于楓樹百鳥列侍志云東北
百里鳳凰山梓潼化書之第五十二鳳山化也今爲
鳳來里有清河寺古清河縣學基有二石柱刻蟠龍
甚工 華陽國志秦始皇時有長人二十五丈見宥
渠太史胡母敬曰是後五百年外必有異人爲大人
者及李雄之王祖世出宥渠識者以爲應之 寰

宇記云岩渠山一名大青山圖經云在州東五十里其山東西兩門延連相接山澗長狹有似溝渠蜀都賦外負銅梁而岩渠也碑目云有石刻岩渠及花果園大字志云渠水有三源一出達州明通鎮一出巴山一出羅娛山至三會鎮過岩渠山會潛水至縣北會渝水經廣安南渠口會嘉陵江至合州會涪水入江按潛水亦發源于岩渠山麓酈道元謂岩渠縣有大穴潛水出焉通岷山下而南入于江是也寰宇記云渝水卽流江也夾水上下皆賓民所居華陽國志岩城故賓國今有賓城盧城碑目引九域志云

流江古賓城有古碑文字磨滅唐鄭谷渠江旅思詩云流落復蹉跎交親半逝波謀身非不切言命欲如何故楚青田廢窮巴瘴雨多引人鄉泪盡夜夜竹枝歌天寧寺記曰岩渠古郡依山爲城自珠嶺東下至石門伏而特起隱隱隆隆由郡北直南而下爲馬鞍爲登高爲西岩擁蔽坤維升虛降原始得郡治岡分嶺別俛首向東爲袁氏之岩迤邐南轉爲瞿氏之山下瞰巴江舒翼展脰直趨水濱而後已由瞿山之北猿岩以南川原開曠形勢之勝與郡治相埒是爲大寧寺按賀知章題袁氏別業云主人不相識偶坐

爲林泉莫謾愁沽酒囊中自有錢卽袁氏岩也志亦收之 隋書地里志通川宕渠其地皆接連漢中有八濛山寰宇云在縣北七里起伏八處有水環之不匝者一里常有煙霧濛其上故名三國志張郃自漢中進軍宕渠之蒙頭盪石與張飛相拒五十餘日飛率精兵萬餘人從他道邀郃軍交戰山道狹前後不得救飛遂破郃巴士乃安志云上有張飛廟碑目有流江縣題名云漢將張飛率精卒萬人大破賊首張郃于八濛立馬勒石 碑目又云唐末中原爲黃賊煽亂前進士崔塗避地于渠州春日獨遊冲相寺由

此登眺翌日北歸題名于石按冲相寺距城四十里乃定光佛道場也崔塗本集詩云水流花謝本無情送盡春風過楚城蝴蝶夢中家萬里杜鵑枝上月三更故園書動經年絕華髮春催滿鏡生自是不歸歸便得五湖煙景有誰爭 方輿又載鄭谷渠州泝江寺詩云起居瀟灑寄禪關高掛朝簪淨室間孤島暫留雙鶴歇五雲爭放二龍閒輕舟偶泛花邊水野屐同登竹外山仙署金閨虛位久夜清應夢近天顏按古泝江寺在縣東起文峰下宋改爲祥符寺 他若山中之沼四時常綠洲上之魚肖像皆黃亦勝與境

會云

隣水縣

寰宇記云隣水出隣山南流中有大磧懸流十丈奔急若驚湍電瀉又云龍穴在隣山之金盤山下入龍門鎮有瀑布百八十尺號爲散水也此山出鐵隣比相次華陽國志云宕渠郡治有鐵官石密山圖所采耳志云杜工部寓居此縣之善慶里昔建有書院岩上大鐫少陵二字又云郭璞游此遺碣云日出照華山金銀對馬鞍鴛鴦池裏宿石版響三潺蓋天池山下溪河中有石一方每擊則響聲三應今謂之

響石板也

大竹縣

昔治在鳳來鄉接渠縣界今治在木門鎮志云縣東門城內二小岡上有兩木對生交合形如關門元徙縣治于此二岡雖連土色則迥別矣傳記所稱九盤七石昭其數也榮城亢谷別其象也巴河漢墓記其跡也馮碑沈闕銘其勛也九盤者治西十里有山高峻盤旋九折行者憚之七石者雁平里有七石參差並立若碑林然榮城者仙門里有榮城四圍險峻高阜寬平宋鮪史君呂保相禦元兵之所

亢谷者編戶西里有亢谷石長數丈高五尺厥形如
鱗 巴河者榮安鄉有巴王河相傳有巴王經此今
爲鎮 漢墓者平池里有王平墓土人掘得銅香爐
安漢侯銀牌等器有漢王將軍字額 馮碑者廷尉
馮緄此縣人墓在縣北古賓城雙石關西南關高丈
二尺額篆云漢車騎將軍馮公之銘文作隸書字猶
可辨 沈關者亦雙石關在縣北一里其一鑄云漢
謁者北屯司馬左都侯沈府君其一鑄云漢新豐令
交趾都尉府君其關上各鑄出屋宇禽獸飛走之像
又有單石關二相去雙石關一里其上鑄雕物像與

此同

蓬州

圖經環蓬皆山而北山爲之主溪壑奇秀兩蓬高峙
屹然雲霄多神仙隱士又多崇蘭黃花每春秋開時
清香滿山谷間 方輿云大蓬山在州東南七十里
狀若海中蓬萊因以爲名小蓬山一名秀立與大蓬
對峙相去二里綏山卽大蓬之始號也按列仙傳云
葛由者蜀之羌人周成王時刻木爲羊賣之一旦乘
木羊入蜀蜀中王侯賓之追上綏山山在安固縣東
三十里隨之者皆得仙術本志云宋元符進士何格

非遊大蓬山詩註引葛仙翁云茲山狀類海中之山是蓬山名由此而改 山有透明岩孔穴相連宛如穿鑿之狀方輿云亦名棲真岩在大蓬山前俯瞰縣郭天氣清明渠達諸山隱隱可數碑目云透明岩下有爾朱真人書隔凡石三大字又云唐人知事任惠林所書透明崖三大字橫直各二尺餘楷法遒勁石刻宛然 志云隋爾朱真人修煉于透明岩成道唐懿僖間抵蓬州客安漢館張氏十二年州守以爲惑眾沈于江二漁者得之釋其縛三人白日昇天 有仙閣岩夜出聖燈志云聖燈現處凡五北山鳳凰山

連翹山大蓬山小蓬山其在大蓬者尤靈異 有降香碑志云宋元豐間此州陳才人宋充媛爲皇子公主祈福立降香碑在大蓬山邑人元祐進士雍沿蓬州十三景詩有云元豐天子太平時宮掖賢明有二姬能就此山燕龍炷至誠爲國長金枝 小蓬山下有仙女墳志云元時普安里民家女及笄一日父母他出有道士叩門求火女不啟戶道士大書閉門不納四字而去女手擦之不去舌舐之乃滅因感而娠父母疑而責之不自白遂投江死其屍逆流親戚相與撈葬之忽自腹中裂出內印方驚駭間水暴漲湧

沙成一大墳于江中水左右夾流若神力焉今名仙女墳 舊縣以相如名嘉陵江遠之周地圖記云司馬相如故宅在縣南二里本地有相如坪相傳云相如別業在此西濱漢水藪薄鬱然其基亦名琴臺高六尺周四十四步碑目云相如故宅碑在相如縣西南光聖寺漫滅不可讀陳子昂文 又云唐相如縣石龕佛像記在縣治縣令陳子良撰按子良伯玉之兄也今州有相如祠宋王儔以舊本長卿像圖于祠壁祠成爲記略云伏念長卿傑出于西京文章極盛之際至今薄海內外人無賢愚皆知有長卿言語之

妙若揭日月儔嘗過縣之琴臺乃圖經所謂長卿故宅者一時遺跡彷彿尙在又謂縣雖僻左而江山風物可樂也從其人遊皆好學能文章亦有所自來矣今之從政者祖律令所有乃敢知至于風化謝非已事否則日不暇也鄧侯獨以自任不辭其爲政知所先務矣按元時祠圯延祐四年驛丞苗成者重建志云嘉陵江畔有石佛寺建于晉魏間有一僧以解龍困獲寶盆弟子爭之龍取盆去元喬西雪歌詳其事今有驛名龍溪或取此志又云嘉陵江有龍宮昔有鮮于氏子見人從雲霧中引入龍宮覽諸怪異歸

述家人云云志又載鮮于氏之子遊學錦官遇老翁
丐通一家信道次石門取書置石上忽有人引生前
行見一王侯曰荷君寄音乃以藥數粒授生後生壽
至百歲按石門在治北六十里右有石梁橫卧嘉陵
江中甚險元至正壬午龍斷其梁水由中行下有深
潭魚龍之巢穴也 酈道元注水經云縣有漢車騎
將軍馮緄桂陽太守李溫塚二子之靈常以二月還
則漢水暴長郡俗于水上祭之 有雞卸神祠益州
記云雞卸祠在相如縣以神在雞卸溪側故爲祠號
有芳溪館元稹感夢詩云蓬州三十里有館名芳

溪已上三則俱在水傍 若夫岩峙東西之勝泉分
金玉之形樓著文明之盛宮開紫極之祥守以眞卿
始爲勝地禪因宗密大振家風皆可述焉 方輿云
東岩在龍章山俯瞰大溪前眺歌陽安固諸山歷歷
可攷西岩在報恩寺西南隅前有閣曰松風謾謾來
吹人 本志云咸安郡西資聖院金錢井每月明輒
有金錢影浮水上又云州治內有玉環井形如玉環
也 文明樓額志云郡人何弱翁建臨邛魏了翁書
里豪藏之家爲雷所擊移之書院雷復擊之凡三震
而木不傷今懸在北門外樓上按弱翁宋進士也了

翁卽魏華父丞相 志云紫極宮在州南洋宮之側
東岩中峰巍然峙起後殿上有金鑄玄宗像宮中老
君殿題字乃蜀王建永平年號 顏魯公本傳唐上
元元年李輔國遷明皇于西宮眞卿率百僚上表請
問起居輔國惡之貶蓬州長史宋唐子西贈杜守詩
云去天一尺古蓬州除守年來得勝流 志云圭峰
禪師名宗密相傳州之鷺鷥山有井井側有巨人跡
師母履之而孕以免母以爲不祥棄之野牛馬避弗
踐鷺鷥羽覆之母乃收撫及長出家于青蓮山講經
地湧青蓮八龍聽講今有八龍池

營山縣

咸安在蓬州曰郡在營山曰縣若大蓬山則兼得而
有之州之北山卽縣之南山也說者以爲大蓬之秀
士岩飛仙岩朝陽洞魯公祠皆當縣界 按秀士岩
乃李特讀書處俗名天子讀書臺岩下石室刻雲屋
二字 志云登封縣令應眞人諱靖唐僖宗時爲登
封令後棄官學道得仙紹興中何格非見之于大蓬
飛仙岩東自是數至格非第 又云大蓬山有朝陽
洞空濶可容數百人封塞已久萬歷中重開 續碑
目云營山縣顏祠有米元章書仙眞事石刻乃近日

南充王隆吉得於費縣草莽中者翻刻于此 其東四十里則青羊山有青羊宮元人建真武古像碑刻存焉鳳院山頂有鳳凰臺相傳鳳凰曾棲其上有龍馬槽石形隱隱如龍鱗之狀宋郡守吳幾復詩蒼石皴紋龍跡在清泉涵泳海源通 西南六十里則披衣山天將雨山上雲霧馳曳如披衣焉山上有雲山寺寺中有池去果州嘉陵江三十里江水或淺其池亦淺江水或漲其池亦漲號天生池其山又有青溪之水出焉 北百三十里則孔雀洞洞門如圭竇其中宏敞左右有石床洞盡處有石孔雀水出喙中

儀隴縣

石銘儀隴洞勒金堆乃晉張英遇仙處也石門雙扇痕迹宛然事詳神仙記中 古方州置在金城山下今縣之主山也爲抱朴子結菴之處有抱朴菴三字刻諸石壁圖經葛洪詩云酒盡君莫沽壺傾我當發城市多囂塵還山弄明月卽此山作矣 志云古伏虞縣置在伏虞山下宋僧道澄結菴于此孫諤贈以詩曰聞說虞山有道澄白雲深處不開扃自言古佛何爲者只是無心一老僧刻石于本山之奉國寺若夫龍車之穴四時花發六澗之水相扶合流火井

天寒炤從地出龍鮫聖水浴蠶倍利則皆以秀特聞矣

蜀中名勝記卷之二十八

閩中曹學佺能始著

潼川州一

蜀中名勝記卷之二十九

漢郫縣三國志云先主入蜀攻劉璋遣諸葛亮等分定州郡略地至郫百姓以牛酒犒師于會軍堂山卽此地東廣漢郡後主置也十道記云廣漢之地有鹽井銅山之富蔬食果實之饒宋劉甲人物志序唐以前凡稱梓潼者卽今之隆慶稱涪者卽今之綿州惟稱郫及廣漢縣乃潼川也 楊炯送梓州周司功詩御溝一相送征馬屢盤桓言笑方無日離憂獨未寬

舉杯聊勸酒破涕暫爲歡別後風清夜思君蜀路難
盧照鄰送梓州高參軍還京詩京洛風塵遠褒斜煙
霧深北遊君似智南飛我異禽別路琴聲斷秋山猿
鳥吟一乖青巖酌空停白雲心王維送梓州李使君
詩萬壑樹參天千山響杜鵑山中一夜雨樹杪百重
泉漢女輸橦布巴人訟芋田文翁翻教授不敢倚先
賢司空曙送崔校書赴梓幕詩碧峰天柱下鼓角鎮
南軍營記催飛檄蓬萊輟校文棧霜朝似雪江霧晚
成雲想出褒中望巴庸方路分李洞送東川高僕射
詩油幢影裏拜清風十里貔貅一片雄三印鎖開霜

滿地四門關定月當空泉浮山葉人家過詔惹爐香
烏道通新起畫樓攜客上絃歌筵內海榴紅李義山
梓州罷吟寄同舍詩不揀花朝與雪朝五年從事霍
嫖姚君緣接座交珠履我爲分行近翠翹楚雨含情
皆有託漳濱多病竟無憊長吟遠下燕臺去唯有衣
香染未銷元稹詩序元和四年三月七日子以監察
御史使東川往來鞍馬間賦詩凡三十二章秘書省
校書郎白行蘭爲予手寫爲東川卷云 唐梓州參
軍蘇榮丞相味道之父到職授書鄉人曰頃注吏部
州參子號縣帶郡名由來不涉老身併是婦兒官職

孫光憲北夢瑣言云西川人言梓州者我東門之草市也柳仲郢爲東川節度使美績流聞嘗語人曰吾仕朝廷三十年清華備歷今日始與西川作市令耶人皆以爲善謔 州治名世堂畫司馬相如王褒揚雄嚴君平屈原陳子昂李太白蘇子瞻八人皆蜀產而秭歸在蜀漢時爲建平郡故三閭得兼收之東坡送周正儒知東川詩爲公掃棠溪畫像或相繼自注云蜀中太守賢者無不畫像矣 元和郡國志州城宋元嘉中築舊潼川志云州之子城上紅樓董璋時建碑目云後唐武信軍軍衙記廣政間歐陽炯撰蓮

花漏天聖中燕肅爲守日置以候昏曉仍自爲記也 杜甫春日梓州登城樓詩行路難如此登樓望欲迷身無却少壯迹有但羈棲江水流城郭春風入鼓鼙雙雙新燕子依舊已銜泥孫樵梓潼移江記云涪繚于鄴迫城如幡淫漲秋狂突堤蕩廬滎陽公始至則思所以洗民患乃鑿江東壩地別爲新江東北注流使水道與城相遠百姓利賴之魏了翁潼川府新城銘云嘉定中永嘉曹君奉使按刑乃建治城隍且包牛峰移西溪爲久遠之計矣 通典云左帶涪水右挾中江水經涪水出廣漢涪縣西北南至小廣魏

與梓潼水合注云小廣魏卽廣漢縣地王莽更名曰廣信也經又云梓潼水出其縣北界西南入于涪又西南至小廣魏南入于墊江註云昔岑彭與臧宮伐公孫述從涪水而上卽此亦謂之內水也鄭谷東蜀春晚詩如此浮生更別離可堪長痛送春歸潼江水
上楊花雪剛逐孤舟繚繞飛 方輿勝覽云城東三里
有東山寺一名普惠寺寺有蘇公泉臨川門下瞰涪江志云隔江修阜如長城有蘇公泉暨石塔在焉杜甫陪章梓州王閬州蘇蓬州李果州四使君登普惠寺詩春日無人境虛空不住天鶯花隨世界樓閣

倚山巔遲暮身何得登臨意惘然誰能解金印瀟灑共安禪魏了翁臨發潼上許侍郎奕提刑餞于東山賦詩留別云人生出處亦何常又到涪江江上鄉山色如逢故人語松聲仍作去年香紅裳大舶滿清鏡翠澱白沙明夕陽未省此懽何日竟擬邀明月照昏黃 李膺益州記云桃花溪在東三十里從涪城縣南流入涪水也 本志云西郊有亭宋蒲規記以爲蜀相高平公所建杜甫有鄴城西原送李判官兄武判官弟赴成都詩 寰宇記云牛頭山在鄴縣西南二里高一里形似牛頭四面孤絕俯臨州郭上有長

樂寺樓閣煙花爲一方之勝槩方輿勝覽云鄴江源出銅山縣赤岍溪遶牛頭山足入涪水亦謂之中江水也又云石谷溪源出當州杜山下亦遶牛頭而入中江九州要記云牛頭山葛仙翁多遊于此今立寺與白獸山相連秦時有白獸爲害夷人射之因刻石于此山今遺像尙存圖經云牛頭山永福寺據其頂廣化寺據其岡羅漢院據其麓本志云永福寺梁武賜名長樂唐名靈瑞宋名永福也杜甫上牛頭寺詩青山意不盡袞袞上牛頭無復能拘礙眞成浪出遊花濃春寺靜竹細野池幽何處啼鶯切移時獨未

休李洞秋宿牛頭寺詩月去簷三尺川雲入寺樓靈山頓離眾列宿不多稠篆字焚初缺翻經誦若流牕間二江冷簾捲半空秋話散松梢別碁終竹節收靜增雙闕念高並五翁遊鶴夢生紅日雲門鎖梓州望空工部眼搔亂廣文頭石室僧調馬銀河客問牛曉鐘歸下界大地一浮漚柳公題題牛頭寺云一出西城第二橋兩邊山木晚蕭蕭井花淨洗行人耳留聽溪聲入夜潮按靈瑞寺有浮圖隋開皇建王勃碑略云牛頭山者廣漢之名峰也延裔幾乎數里直上逾乎百仞蒼岑隱嶙旁分玉砌之階碧洞逶迤下趣

金陵之苑因危立戶跨險分榮又于山頂別立浮圖每至兩江春返四野晴初山川霽而風景涼林甸清而雲霧絕賞因時弁筆爲神驅有情君子誰爲捨乎神仙傳云牛頭山半有洞人傳八百里與眉州通曾有避罪者匿其中後于青神中巖見之碑目云洞門寺一名天宣在牛頭山麓舊鐫洞門字于岩側本志云西五里三臺山下有魯交洞交讀書于此卽宋仁宗手錄其清夜吟者 盧照鄰集云梓州城南池亭者長史張公聽訟之別所也觀其巖嶂迴複川流灌注雲牕綺閣負繡堞之透迤澗戶山樓帶金隍

之繚繞信巴蜀之奇制矣圓潭寫鏡光浮落日之津雜樹開帷彩綴飛煙之路藤蘿杳靄挂疎陰以送秋鳧雁參差結流音而將夕百年之懽不再千里之會何常下客悽惶暫停歸轡高人賞玩豈輟斯文咸請賦詩六韻成章云爾照鄰得池字詩云二條開勝跡大隱叶冲規亭閣分危岫樓臺遶曲池長薄秋煙起飛梁古蔓垂水鳥翻荷葉山蟲咬桂枝遊人惜將晚公子愛忘疲願得迴三舍琴樽長若斯杜甫宴章梓州水亭詩云城晚通雲霧亭深到芰荷吏人橋外少秋水席邊多近屬淮王至高門薊子過荊州愛山簡

吾醉亦長歌 勝覽云兜率寺在南山一名長壽亦
隋開皇建卽東坡詩所稱牛頭與兜率雲木蔚堆壠
也林泉糾合之勢山川表裏之形抽紫巖而四絕疊
丹峰而萬變連溪拒壑所以控引太虛蒸雲駕雨所
以盪洩元氣此見諸王勃本寺浮圖碑矣杜甫上兜
率寺詩云兜率知名寺眞如會法堂江山有巴蜀棟
宇自齊梁庾信哀雖久周顒好不忘白牛車遠近且
欲上慈航文同題兜率寺云簿領迷人喜暫閒聊尋
古寺陟孤巒柏藏一逕中間窄雲斂千峰四面寬遠
目已將飛鳥過寸心更乞老僧安若爲借得禪房宿

卧看龕燈一點殘 寺內有文塚銘云文塚者長沙
劉蛻復愚爲文不忍棄其草聚而封之也蛻愚而不
銳于百工之技天不工蛻也而獨文蛻焉故飲食不
忘于文晦冥不忘于文悲戚怨憤疾病嬉遊羣居行
役未嘗不以文之爲懷也適當無事而天下將以文
爲貴號文明代生植明晦皆效文用故日月星辰文
乎旂常魚蟲鳥獸文乎彝器徐方之土文于侯社夏
翟之羽文于旗旄登龍于章升玉于藻百工婦人雕
礪染練以供宗廟祭祀之用豈獨蛻也生知效用不
及時文也然而意嘗獲助於天不獲助於人故其窮

雖窮無憾也當勤意之時不敢噫不敢咳不敢睡不敢跂倚嗜欲躁競忘之于心其祇祇畏畏如臨上帝故有粲如星光如貝氣如蛟宮之水又有黯如屯雲如久陰如枯腐熬燥之色則有如春陽如華川透透迤迤則有如運海如震怒動蕩怪異夫十爲文不得十如意少如意則豈非天助乎常欲使天下聞之而必行勸之而必蹈散之茫洋以爲道演之浸潤以及物然後爲農文之使風雨以時兵文之使戎虜以順文于野文于市使得其所幽隱之士以出口者使之言材者使之用然而自振者無力終之者甚稀豈非

不獲于人助乎嗚呼十五年矣實得一千一百八十紙有塗者乙者有注楷者有覆背者有珠墨圍者于是以周易筮之遇復之同人筮者曰鳴于地中殷殷隆隆七日不復復來其天下昭融乎它日更召龜而令之將聽襲吉卜于火如秦兆惟曰不吉卜于水不成乎河洛兆則亦惟曰不吉卜于木而悶悶土叶吉纍纍爲塚則汲之兆乎峭峭爲壁則魯之兆乎且其占曰土之文爲阿山爲華英將不崩不竭爲滋味而傳乎結爲丘陵爲其設險乎融爲川瀆率其朝宗乎華爲百穀以潔祭祀之粢盛乎不然使其速腐爲墟

壤生芻藁以食牛羊乎化爲泥塗甄陶以作器乎將
塊爲五色而分封茅社乎流於樂爲土鼓爲缶桴以
泄其和聲乎夷爲都邑以興宮廟坎爲洿池以澤生
植乎祀爲壇竈乎竅爲井墓乎吾皆不得而知也嘗
旣不得爲吾用惟速化爲百工之用慎毋朽爲芝菌
以怪人自媚慎毋堅爲金鍍以作貨起爭慎毋滴爲
釀泉以味乎諂口慎毋禱爲城社以狐鼠憑妖慎毋
聳爲良材以雕斲傷性慎毋萌爲蘭茝以佩服見藝
嗚呼介而爲石使之服言舒而爲蠙使之飲泉旣而
他年遊魂之未返者亦命巫以巾三招之號曰在几

閣而來歸兮視不汝醜在口吻而來歸兮譽不汝久
噫筆絕之年而麟見崇文其無崇乎哈非珠玉斂無
裙襦後世詩禮之儒無驚吾之幽墟其塚也在莽蒼
之野大塊之上時大唐大中之丁卯而戊辰之季秋
銘云文乎文乎有鬼神乎風水維貞將利其子孫乎
按蛻字復愚唐懿宗朝爲左拾遺上書言令狐綯之
子瀉不宜爲言官貶山陽令後寓居潼川又北夢瑣
言云劉蛻桐廬人早以文學進士其父嘗戒之曰任
汝舉進取窮之與達不望于汝吾沒後慎勿祭祀乃
乘扁舟以漁釣自娛竟不知其所適蛻後登華貫出

典商于霜露之思于是乎止臨終亦戒其子如先考之命蜀禮部尙書纂卽其息也常爲同列言之益部談資云文塚庭前古柏數百株皆虬枝而龍幹

通志云州南五里印臺山趾方而頂圓故名其右三四里有落馬崖昔有易玄子乘馬至此馬化爲龍躍入江輿地紀勝云州南七里有鶴林寺杜詩牛頭望鶴林梯徑遶幽深春色浮山外天河宿殿陰傳燈無白日布地有黃金休作狂歌客回看不住心碑目云王勃庾信護聖寺碑在城北本寺內又云唐護聖寺鐘銘紀二年節度使顧彥暉鑄有銘又云護

聖寺水陸淨土巖北有甘泉亭碑李潮八分書又云甘泉寺誓犀碑李雍書又云護聖寺彌勒崖佛頌唐大中年東川判官李商隱文高僧傳云梓州城北有白門蘭若在長平山卽北山也山長而平故名碑目云梓州官僚磨崖贊唐武后時司法參軍楊炯作在北崖字十六七磨滅不可讀炯又爲北山惠義寺銘曰長平山兮建重閣上穹隆兮下磅礴紛被麗兮駢交錯儼靈相兮冲寂寞誰所爲兮天匠作杜甫惠義寺送王少尹赴成都分得峰字詩云苒苒谷中寺娟娟林表峰闌干上處遠結構坐來重騎馬行春徑

衣冠起晚鐘雲門春寂寂此別惜相從

射洪縣

李膺益州記云婁縷灘東六里有射江土人俗訛以江為洪後周從俗因改射洪 水經注云涪江水又東南合射江志云縣東十五里射江源自劍州歷梓至獨坐山下與涪江合流也 楊用修雜字韻寶云洪大壑也俗省作洪川中之射洪徐州之呂梁洪義皆取此其言不知何據然按寰宇記云萬頃澤田在通泉縣東北二十二里澤內方萬頃則亦與大壑之義近矣通泉今併當縣 陳子昂故宅在東武山下

本集云子昂四世祖陳方慶好道隱于此有唐朝道觀址而真諦寺在其左有暉上人者子昂與之往還本集酬暉上人夏日林泉詩云聞道白雲居窈窕青蓮宇巖泉流雜樹石室千年古林卧對軒窗山陰滿庭戶方釋塵勞事從君襲蘭杜又酬暉上人秋夜山亭有贈詩云皎皎白林秋微微翠山靜禪居感物變獨坐開軒屏風泉夜聲絕月露宵光冷多謝忘懷人塵憂未能整又酬暉上人獨坐山亭有贈詩云鐘梵經行罷香牀坐入禪巖庭交雜樹石瀨瀉鳴泉水月心方寂雲霞思獨玄宜知人世裏疲病苦攀緣又暉

登口名勝記 卷二十九
上人房餞齊少府使入京府序云永淳二年四月孟
夏東海齊子宦于此州雖黃綬位輕而青雲器重故
能委邦君而坐嘯屈刺史而知名屬乎鑾駕巡方諸
侯納貢將欲對揚天子命我行人執玉帛而當朝擁
驂駢而戒道指途河渭發引岷峒粵以丙丁之日次
于暉公別舍蓋言離也爾其巖泉列坐竹樹交筵吐
青藹於軒窗栖白雲于左右參差池榭亂山水之清
陰繚繞階庭雜峰崖之異勢入禪林而避暑肅風景
于中庭開水殿而追涼徹氛埃于戶外瑤琴合奏翠
暉時行譚窈窕于天人極留連于晷刻旣而歡樂極

良晨征攀白日而不迴唱浮雲而告别山光黯黯凝
綠樹之將曛嵐氣沈沈結蒼雲而遂晚雖同交未阻
風月可留歧路方乖關山成恨嗟呼朝廷子入期富
貴于崇朝林嶺吾棲學神仙而未畢青霞路絕朱紱
途遙言此會之何時願相逢而誰代永懷千古豈知
仁者之交凡我三人盍崇不朽之迹斯文未喪題之
此山同疏六韻云爾 碑目云陳拾遺故宅有趙彥
昭郭元振題壁杜甫過陳拾遺故宅詩云拾遺平昔
居大屋尙修椽悠揚荒山日慘淡故園煙位下曷足
傷所貴者聖賢有才繼騷雅哲匠不比肩公生揚馬

後名與日月懸同遊英俊人多秉輔佐權彥昭超玉
價郭振起通泉到今素壁滑灑翰銀鈎連盛事會一
時此堂豈千年終古立忠義感遇有遺編圖經載陳
拾遺建德碑大厯六年趙僖代梓州解于刺史作予
過縣之東門闌闔中榜曰唐拾遺陳公宗祠想必其
後遷徙入城者 子昂讀書在金華山志云上拂霄
漢下瞰涪江有玉京觀在本山上方輿云東晉陳勳
學道山中白日仙去梁天監中建觀有唐明皇所鑄
老君像陳拾遺祠中有盧藏用祭文陸魯望云枝峰
蔓壑秀氣旁礴不啻神仙登臨也觀志有宋治平二

年賜號玉京延祐元年道士陳若海重修二年歲次
乙卯九月丙午朔重九日甲寅前渠州學正杜文炳
記本集春日登金華觀詩云白玉仙臺古丹丘別望
遙山川亂雲日樓榭入煙霄鶴舞千年樹虹飛百尺
橋還疑赤松子天路坐相邀杜甫冬到金華山觀因
得故拾遺陳公學堂題迹云涪右眾山內金華紫崔
嵬上有蔚藍天垂光抱瓊臺繫舟接絕壁杖策窮縈
洄四顧俯層巔澹然川谷開雲嶺日色死霜鴻有餘
哀焚香玉女跪霧裏仙人來陳公讀書堂石柱灰青
苔悲風爲我起激烈傷雄材盧藏用贊曰岷山導江

回薄萬里浩瀚鴻溶東注滄海靈光氛氲上薄紫雲其瑰寶所育則生異人於戲才可兼濟屈而不伸行通神明困于庸墜子曰道之將喪也命矣夫其相近者爲黃溪志云在縣北一里卽黃初平叱石成羊處爲上方寺志云北關外唐有釋氏文公知名杜甫贈之詩云野寺隱喬木山僧高下居俯視萬家邑烟塵對階除吾師雨花外不下十年餘長者自布金禪龕只晏如爲石鏡寺志云在縣北二里金華山之側盧照隣詩古墓芙蓉塔神明松柏烟鸞沈仙鏡裏花沒梵輪前鉢衣千古佛寶月兩重圓隱隱香塵

夜鐘聲徹九天按寺宋淳熙間復建國朝成化三年僧繼圓于草莽中得古碑字漫滅不可攷惟存一詩云昔日朱輪守經過野寺家杜間留墨跡泉下隔年華雲去空雕檻風來捲碧沙江山雖似畫每到動吁嗟繼圓因遺址重修其稍遠者益部談資云射洪北三十里山巖迴合梯磴逶迤谷口石刻風磴雲門四字乃唐何將軍山林也杜少陵與鄭廣文同遊之處少陵早發射洪縣南詩寒日出霧遲清江轉山急蓋山通泉路也子昂之墓在獨坐山寰宇記云山在縣東南二十五里周迴一里高一百丈卓然孤

峻南枕涪梓二水志云此山似人巍然獨坐故名在縣南十五里盧藏用題曰道喪千載而得陳君子昂郭廷謂詩魂逐東流水墳依獨坐山按此山東北有公成山唐時梓潼官吏掘得石龕龕中有尊像一真人六獅子昆侖各二于時王維爲留司表賀略云是聖祖見于萬春鄉語絳都人而指其處也周流六虛言于晉而驗于蜀混成一氣出于有而入于無未達齋心初迷三里之霧旣符真氣俄成五色之雲山腹洞開仙容儼若萬物今覩千劫未逢也其近者爲懸巖山寰宇記云在縣南一十五里遠望懸崖皎

如白雪舊名白崖山天寶三年勅改梓州志白崖卽玉屏山下有陸使君祠使君諱弼梁代謫瀘州刺史卒于官櫬過射洪之玉屏山而舟覆瀘人哀之爲立廟于此土人呼曰白崖廟宋世賜號顯惠梁書有傳卽陸放翁所云以杜詩爲籤譜往往有驗者詳見詩話中爲龍門洞志云在卧龍山右里許宋良菴先生隱處紫岩張公嘗訪之大書龍門二字左有紫岩叟圖書又其下題云淳熙戊申仲冬十三日秦國張煜自翠麓縱步良菴龍門獲觀先公大師魏國忠獻遺跡江山增重矣煜敬拂塵不勝感慨爲全真觀

志云縣南二十五里全真觀有古柏形如卧龍又名木龍觀 遠之為乾明寺志云治南五十里唐貞觀間僧慧悟開山宋熙寧中僧居信建王安石贈以詩云如今別我去成都始覺吾師道更殊坐看空中雲與雁五湖明月一輪孤寺中有御書閣其下為堂庭可容百人柱皆連抱兩山盤礴檜柏森然此知軍州事陳鵬所記也已上是通泉西界 高僧傳云通泉縣西山有大佛像高百三十丈兩邊泉流唐貞觀慧震所鑄也 有歸雲洞志云在縣南五十里洞深四丈五尺廣八尺餘其高如廣之度中有石榻二石龕

二茶竈石碁局各一 今象求先生讀書處按象求通志稱中江人第進 旨至侍講出將使命入侍經筵存心制行為士所矜式也 又遠之百里則沈水出焉為普通泉縣治 黃澗名川大浸名寺皆取流泉交注之義也寰宇記云沈水在通泉縣北即漢臧宮破公孫述將延岑處又云通泉山在縣西北二十里東臨涪江絕壁二百餘丈水從山頂湧出下注涪江湧泉郡故城在此老杜通泉驛詩驛樓衰柳側縣郭輕烟畔一川何綺麗盡日窮壯觀楊天惠連鰲閣記通泉為梓名邑江山秀潤田土平夷蓋俱詠歎其

蜀中名勝記 卷二十九
美也。碑目云：晉雲南太守段宗仲德政碑在通泉縣碑在墓下。又云：唐薛稷書慧普寺三字，方徑三尺，筆畫雄勁，在通泉壽聖寺。聚古堂按：慧普寺梁大同中建，初造彌勒下生一座，相好端足。唐貞觀年放光，戶牖皆明，蜀人稱異焉。王勃頌曰：長江舊域，廣漢遺區，川分潼峽，塞接岷渝，閭閻四會，亭障咸紓，爰開寶地，實控名都，霞墻百雉，雲甍四注，紫闕尋烟，頽樓結霧，波流虹起，雷奔蠖步，網罩星鶉，璫栖月兔，靈機藻粹，禪室安閒，珮金範玉，舉翠浮丹，神宮不夜，虛室長寒，光超有色，貺出無端，清露花徑，飛泉葉戶，礪綠苔

秋山蒼樹古，茫茫庶類，巍巍淨土，鶯鷺同歸，華夷共聚，第一義諦，寥廓法門，迹離生滅，思舉乾坤，情迷則復，道在爲尊，惟名與器，萬古長存。張彥遠名畫記云：薛稷畫鶴在通泉縣署屋壁後，老杜詩：薛公十一鶴，皆寫青田真。卽此處也。唐詩紀事：郭元振神龍間尉通泉，任俠使氣，不事小節，武后召欲詰問，旣與語，奇之，索所爲文章，上寶劍篇，后覽之，嘉歎。杜甫過代公宅詩：豪傑初未遇，其跡或脫略。代公尉通泉，放意何自若。及夫登袞冕，直氣森噴薄，磊落見異人，豈伊常情度。我行得遺跡，池館皆疏鑿，高詠寶劍篇，神交

付冥漠志云郭代公墓在通泉縣東按普惠寺小園有代公姬薛氏殯地陳子昂爲誌銘 予觀李知幾義冢偈信達者之言也併錄之偈云佛子初出母胎時云何便有人我相布施慳貪分兩種是義不義相對治恩怨一墮于有情親愛路人生異見我今施汝大屋宅與汝普懺諸有情同舟胡越遇黑風忽然得此大洲島熙熙于于相勞問語笑相接如一家佛子便當具正見此本無情而相聚不作思惟能相忘此義廣大無情故彈指贊歎諸佛子願如流水大池魚同日上生初利天受諸天子大快樂長者亦以無

情施是故不名爲義者淳熙二年九月己卯朔朝散郎前成都府路轉運判官李石撰 右方舟先生所述射洪雍氏義塚記邑士高君喻持以相示乃爲記曰骨肉斃于下陰爲野土其氣發揚于上爲昭明此神之著也夫生于土歸于土雖物理之常要其死而不忘者其神存也若專冥漠之中輪轉且久一旦得塊土掩骼所托何厚若猶有知而不昧歸趣吾將以觀其復而爲生生化化之候淳熙丙申甲寅迪公即潼川府射洪縣主簿管學事韓南杞謹跋

其下流入涪江縣以溪名唐天寶年置舊為唐興
 蓬萊溪遶
 土張神君解道德經于此產九節菖蒲
 蔚然左右環拱上有七曲老人祠高臺五層山皆赤
 長江賈島之祠設焉 按赤城山在治東一里中峰
 赤城山神君之跡著焉有青石山鄧芝之墓存焉有
 縣有三興之號晉為晉興又為巴興唐為唐興 有
 蓬溪縣

蜀中名勝記卷之三十

閩中曹學佺能始著

潼川州二

蓬溪縣

其下流入涪江縣以溪名唐天寶年置舊為唐興
 蓬萊溪遶
 土張神君解道德經于此產九節菖蒲
 蔚然左右環拱上有七曲老人祠高臺五層山皆赤
 長江賈島之祠設焉 按赤城山在治東一里中峰
 赤城山神君之跡著焉有青石山鄧芝之墓存焉有
 縣有三興之號晉為晉興又為巴興唐為唐興 有
 蓬溪縣

青石山昔置青石縣卽晉興縣也有祠甚嚴九州要記云天下青石無加于此可爲鐘磬華陽國志曰鄧芝征涪陵見玄猿緣其山芝性好弩手自射猿中之猿子拔其箭捲木葉塞其創芝歎曰吾傷物之性其將死矣見此山之美後遂葬焉李膺益州記云青石嶺有九折亦名九節嶺九嶺之溪水出焉碑目云青石縣九節鎮金地院有孝童孝女碑志云九節鎮在縣東南百里與合州聯界 長江後魏置縣卽巴興縣也賈島送僧詩云久住巴興寺如今始拂衣欲臨秋水別不向故園歸島蓋主簿是縣者寄令狐相

公云策杖馳山驛逢人問梓州長江那可到行客替生愁有明月山在縣西南二里島詩云言心俱好靜解署落暉空歸吏封宵鑰行蛇入古桐長江微雨後明月衆星中若任遷人去西溪與剡通 志云浪仙有墓在焉杜荀鶴詩謫官自麻衣啣冤至死時山根三尺墓人口數聯詩仙桂終無分皇天似有私暗松風雨夜空使老猿悲唐安錡詩倚恃才難斷昂藏貌不恭騎驢衝大尹奪卷悞宣宗馳譽超先輩吟詩下我儂司倉舊曹署一見一心忡曹松詩先生不折桂謫去抱何冤已葬離燕骨難招入剡魂旅墳低却草

稚子哭勝猿冥漠如搜句宜邀賀監論薛能詩云賈子命堪悲唐人獨解詩左遷今已矣清絕更無之畢竟吾猶許商量衆莫疑嘉陵四十字一一是天資李洞詩一第人皆得先生豈不銷位卑終蜀土詩絕占唐朝旅葬新墳小魂歸故國遙我來因奠灑立石用爲標李頻詩秦樓苦吟夜南望只悲君一宦終遐徼千年隔旅墳恨聲流蜀魄冤氣入湘雲無限風騷句時來月下聞弘秀詩燕生松雪地蜀死葬山根詩僻降今古官卑悞子孫塚闌寒月色人哭苦吟魂暮雨滴碑字年年添蘚痕崔塗詩云雕琢文章字字精我

經此處倍傷情身從謫宦方沾祿才破椎埋更有聲過縣已無曾識吏到廳空見舊題名長江一曲年年水應爲先生萬古清劉滄詩云塵室寒窗我獨看別來人事幾凋殘書空蕭寺一僧去雪滿巴山孤客寒落葉墮巢禽自出蒼苔封砌竹成竿碧雲迢遞長江遠向夕苦吟歸思難鄭谷詩云水遶荒墳縣路斜耕人訝我久咨嗟重來兼恐無尋處日落風吹鼓子花黃滔詩云曾搜景象恐通神地下還應有主人若把長江比湘浦離騷不合自靈均張蠙詩云生爲明代苦吟身死作長江一逐臣可是當時少知己不知知

蜀中名勝記 卷之三十一
已是何人 宋龔鼎賈浪仙祠堂記云唐韓退之善
爲歌詩道性情一時相從者如孟郊張籍最號友善
而浪仙學詩于劉義晚得偕與二子游頗以才調相
推高雖然觀其風致清澹得之自然誠亦郊籍之儔
故後世學者語騷雅之流裔孰敢外三子焉浪仙由
長江徙官安岳而卒於會昌三年凡爲編次其詩者
二人許彬者謂之小集而天仙寺浮屠無可謂之天
仙集當時之人有名者無可俱請之讚天仙集傳之
旣久反以讚爲退之之辭然退之前後二集皆所不
載及得李洞句圖序質之然後信其非也浪仙于舊

史無傳邇來朝廷新其書遂得附名於退之後而頃
歲居官者署祠堂於蜀土神廟廡之次今伯氏實佐
令長于是邑嘗議其堂雜與神居非所宜也而尉有
西圃者在唐爲主簿之廨址誠得遷其舊構更以繪
像無撓邑人於義何有旣遂經畫而就之其屋不華
而完其地不奧而清兩傍封植筠柏鬱然嗚呼浪仙
沒距今二百二十餘歲矣名始著于史策而其遺貌
又得宅于故處迺知士之能蹈善雖日月之遠必有
爲黼黻其迹者今幸爾副其身後之所待措之無窮
宜不復恨矣而伯氏遠以書諭俾文其實且使後人

知改作之有由也 碑目云招隱洞在長江縣南二十里內有唐員半千題字可搨舊長江縣南二十里有唐磨厓金剛經圖 又云長江覺苑寺有唐元和十二年遂州刺史張九宗撰鑄鐘記併書 異物記云蓬溪西北長江縣界古有珠玉村其下爲珠玉溪又有火井在長江縣客館鎮之北二里伏龍山下地窪若池以火引之則有聲隱隱然發于池中少頃熾炎夏月積雨停水則焰生水水上水爲之沸而寒如故水涸則土上有焰觀者至焚其衣裾也 舊唐興縣客館設于此杜甫記云中興之四年王潛爲唐興宰

修厥政事始自鰥寡憚獨而和其封內非侮循循不畏險膚而行而壹咨於官屬于羣吏于眾庶曰邑中之政庶幾繕完矣惟賓館上漏下濕吾人猶不堪其居以容四方賓賓其謂我何改之重勞我其謂人何咸曰誕事至濟厥載則達觀于大壯作之閤闕作之堂構以永令圖崇高廣大踰越傳舍通梁直走寃將墜壓素柱上承安若泰山兩序旁開發洩霜露潛靚深矣步櫺複雷萬瓦在後匪丹雘爲實疎達爲迴廊南注又爲覆廊以容介行人亦如正館制度少劣直左階而東封植修竹茂樹挾右階而南環廊又注亦

蜀中名勝言 卷之三十一
可以行步風雨不易謀而集事邑無妨工亦無匱財
人不待子來定不待方中宿息井樹或相爲賓或與
之毛天子之使至則曰有人焉某無以栗階州長之
使至則曰某非敢賓也子無所用俎四方之使至則
曰子貺某多矣敢辭贄或曰明府君之侈也何以爲
人皆曰我公之爲人也何以侈子徒見賓館之近夫
厚不知其私室之甚薄器物未備力取諸私室人民
不知賦斂乃至於館之醯醢闕出於私廚使之乘駟
闕出于私廡君豈爲亭長乎是躬親也若館宇不修
而觀臺榭是好賓至無所納其車我浩蕩無所措手

足獲高枕乎其誰不病吾人矣玼瑕忽生何以爲之
是道也施舍不幾乎先覺矣杜之朋友歎曰美哉是
館也成而人不知人不怒廨署之福也府君之德也
府君曰古有之也非吾有也余何能爲是亦前州府
君崔公之命也余何能爲是日辛丑歲秋分大餘二
小餘二千一百八十八杜氏之老記

中江縣

眉山程建用與蘇子瞻書云中江于東蜀號爲劇邑
以衰拙臨之始至若無暇洎半年而滯獄清期年而
庶事稍就敘乃謀葺亭臺池館之舊則西園之勝有

蜀中名勝記 卷之三十一
環翠亭焉亭面北而枕南相傳以薛公田所建也亭前兩株桐挺直無節目高二丈餘枝葉扶疎亭後甃石爲山傍植紅蕉三面控掩以墻墻間列詩碑皆薛公與其子球任本路憲日并歷政諸公之所作也袤百有五十丈曰養閒亭亭之後爲頤正堂夾堂植花菓堂之東爲潛閣閣之前牡丹數叢深紫色此蜀花之鮮有也閣後懸窗窗外竹百餘本紫如葦織如筍森如東高出簷際皆廖公子孟創植文公同爲之記其亭雄壯冠于邑居西有臺高丈餘榜曰觀風登臺倚欄其南北與西境山川歷歷可觀惟東則爲亭屋

縣樓之所蔽西有棲妙山山有洞田真人所名也今爲集虛觀古記云此地舊多惡蟲蛇唐廣德中真人自南陽來卜居其地遂絕此患南江自縣之神泉縣來衝山足已而東走百五十里至郡城下合涪江東江來自涪城歷馬橋鎮過五成山至元武山下入于南江二江之水冬或可涉夏秋積雨往往漲至數丈爲墊溺之患歷政禦以隄防惟廖公有碑亦與可之文也五成在邑之艮地山頭有二圓崖高徑各丈餘俗號挺眼以邑民多頑悍稟賦于是前令修堤命匠者塊之以爲堤址今無矣觀山之壯而詳其名則五

成者取爲壇五成之義今以成爲城蓋誤也元武在
邑東其山周回三里六屈三起有龜蛇之象昔之邑
名與山皆取于此僧寺枕其麓榜以大雄而元武之
象實寓其中其下有淵淵前後石大如拳小如彈連
延五七里其有龜甲之文者近年又有蛇蟠之形者濱
江之民三四琢之以售於好事者此物理之不可攷
也觀風臺之南有一亭亭壁塑亂山榜曰栩栩巖取
夢蝶之義昔官于此者或譏其晝寢彼固以此爲名
建用因而廣之以塑峩眉而致其意焉建用昔寓峩
眉六七年歸吾鄉而卜居于北郊則又遠與之相直

每春晴秋曉則夫蒼翠嶒嶸巍然當吾廬之門自從
官于茲別是山也不爲不久而歸遊未有期故形于
塑塑匠邑民也亡慮百餘人凡兩川釋宮老廟之像
與夫豪貴之家欲狀山川禽獸草木之類莫不出于
邑匠選其匠之尤者而指示以圖于是曲盡其妙自
公之暇近而觀之由其足而循之以至於頂磴道橋
閣相屬如線僧寺山洞皆如其地蟄雷之穴光相之
巖枯木飛瀑鮮不悉備恍然以爲昔年之旅寓也遠
而觀之瑣碎不能分而大勢橫抹天半忽然以爲出
吾廬而倚衡門也嗟夫玩其塑以爲真其迷可笑然

蜀中名勝記 卷之三十一
窮其真亦何異於塑而玩之者未能離形骸之內則
真與塑何所往而非迷况區區之迹旅寓之年與夫
去北郊之居逾二紀矣淒然傷齒髮之暮而彼崔嵬
者不失其故不知冥冥中去者彼亦不得已而遜此于
道未明者之所爲豈可以累於通人哉建用欲易榭
榭之名而記其所以塑壁之意恨才力之不逮故舉
一邑之大概以俟明公雖蕞爾之地不足以掛文翰
亦願明公命一名撰一記使不才之人得以附諸末
幸也東坡答書云軾啟自別永久多難流落百事廢
弛不復通問獨吾兄不忘疇昔時枉遠書感怵不可

言讀別紙所記山水園亭之勝廢卷閉目如到其間
所要亭記豈敢於吾兄有所惜但多難畏人不復作
文字惟時作僧佛語耳千萬體察非推辭也遠書不
欲盡言所示自是一篇高文大似把飯叫饑聊發千
里一笑會合無期臨書悽然 文同中江縣新堤記
云縣爲江所環故名之按縣東西有二橋河水所經
西橋河自緜州來者逕羅江縣至此始可舟古巴歌
云豆子山打瓦鼓陽平山撒白雨下白雨取龍女織
得絹二丈五一半屬羅江一半屬元武卽此水也
志云西橋河邊有洗墨池水色如墨唐文如海註南

華經於此 碑目云游仙觀老君碑田真人殿記俱
在中江縣西集虛觀蜀廣政六年立志云昔南陽田
真人寓栖妙山修煉每江漲往來水上如履平地廣
德中於市南石橋上輕舉矣集虛觀在縣西一里宋
縣尉車彥遠有記杜甫詩凱州城下湍水流凱州城
隅多古丘集虛道人不復見白雲西北多悠悠 方
輿勝覽云勾溪廟卽天齊王祠蘇子瞻詩遙知勾溪
路老稚相扶擁看畫古叢祠百怪朝幽拱通志云勾
溪廟在中江治西祀隋凱州守李直之按直之字正
叟本長安人刺史凱州興學設教化行俗美末年上

疏乞骸骨隱銅官山童稚歌曰我知古凱州今日得
李侯李侯切莫去此地可無憂 東橋河自涪城來
者卽中江也李膺益州記云蜀漢五城縣立此水濱
在三隅山之東華陽國志云郡東南有水通于巴漢
時置五倉發五縣民尉部主之後因以爲縣注水經
云涪水又南枝水出焉西逕廣漢五城縣爲五城水
是矣 本志云城東寧國寺在廢五城縣側爲大夫
趙才司功牟德建宋秘書丞萬當世記併贊存焉
東西二水至元武山下合而東南流九州要記云元
武山一名赤雀山一名宜君山山有麈尾入貢又華

陽國志云元武山一名三隅山在縣東二里其山六
屈三起出龍骨傳云龍升其山值天門閉不達死於
此後沒地中民掘取其骨入藥 唐詩紀事王勃盧
照隣邵大震九月九日登元武山旅眺倡和絕句詳
見詩話中盧照隣宿元武山詩云方池開曉色圓月
下清陰已乘千里興還撫一絃琴杜甫題元武禪師
屋壁詩何年顧虎頭粉壁畫滄洲赤日石林氣青天
江海流錫飛常近鶴杯渡不驚鷗恍若廬山路眞隨
惠遠遊本志云元武山卽大雄山也聖水泉出焉王
勃集謂元武山有聖泉焉浸淫歷數百千年乘巖泌

湧接磴分流下瞰長江沙堤石岸咸古人遺跡也茲
乃青蘋綠芰紫苔蒼蘚遂使江湖思遠寤寐寄託旣
而崇巒左披石壑前縈丹嶠萬尋碧潭千頃松風唱
響竹露熏空瀟瀟乎人間之難遇也方欲以林壑爲
天厲琴罇爲日月嗟乎古今不改方深川上之悲少
長同遊且盡山陰之樂盍題芳什共寫高情得泉字
詩曰披襟乘石磴別藉宴深泉蘭氣薰山酌松聲韻
野絃響飄垂葉外香渡落花前興盡林塘晚重巖起
夕煙 子安又有題元武山道君廟詩序云吾之有
生二十載矣雅厭城闕酷嗜江海嘗學仙經博涉道

蜀中名勝記 卷之三十一
記知軒冕可以理隔鸞鳳可以術待而事親多衣食之虞登朝有聲利之迫清識滯於煩城仙骨摧於俗境嗚呼阮籍意疎嵇康體放有自來矣常恐運促風火身非金石遂令林壑交喪煙霞板蕩此僕所以懷泉塗而惴恐臨山河而歎息者也粵以勝友良暇相與遊於元武西山廟蓋蜀郡三靈峰也山東有道君廟古者相傳以名焉爾其丹壑藜倚玄崖糾合俯臨萬仞平視重元乘杳冥之絕境屬芬芳之暮節玉房跨霄而懸居瓊臺出雲而高峙亦有野獸羣狎山鶯互囀崇松埒巨柏爭陰積瀨與幽湍合響眇眇焉道

道焉王孫何以不歸羽人何以長往其元都紫微之事耶方斂手鐘鼎息肩巖石絕視聽於寰中置形骸於度外不其然乎時預乎斯者濟陰鹿宏胤安陽邵令遠耳盍詩以言志不以韻數裁焉詩曰源水終無路山阿若有人驅羊先動石走兔欲投巾洞暎秋泉冷巖朝古樹新斜崖連鳥翅疊磴上魚鱗化鶴千齡早元龜六代春浮雲今可駕滄海遂成塵其二云振翮疲霜冷征月伴天潯回鑣凌翠壑飛軫控青岑巖荒靈竈沒澗毀石渠沈宮闕雲間近江山物外臨玉壇栖暮液珠洞結秋陰瀟瀟離俗影擾擾望鄉心誰

蜀山名勝記 卷之三十一
三
憶山遊好徒傷人事侵。又有遊廟山賦序云。元武山
西有廟。山東有道君廟。蓋幽人之別府也。長蘿巨樹
稍翳雲日。王子馭風而遊。泠然而喜。益懷霄漢之舉
而忘城關之戀矣。思欲攀洪崖於煙道。邀羨門於天
路。仙師不存。壯志徒爾。俄而泉石移景。秋陰方積。松
柏羣吟。悲聲四起。背鄉關者無復向時之榮焉。嗚呼
有其志無其時。則知林泉有窮路之嗟。煙霞多後時
之歎。不其悲乎。遂作賦曰。陟彼山阿。積石峩峩。亭皋
千里。傷如之何。啟松崖之密蔭。攀桂岳之崇柯。隔浮
埃於地絡。披顥氣於天羅。爾其綠巖分徑。蒼岑對室。

茵軒丹紉。芝塲翠密。俯泉石之清冷。臨風飈之瑟颺。
仰紺臺而携手。望元都而容膝。躡霞岡於玉砌。步雲
岳於金壇。懷妙童於真女。想青螭而碧鸞。情恍恍而
將逸。心迴迴而未安。見丹房之晚晦。知紫洞之宵寒。
旣而霧昏千嶂。煙浮四野。恨流俗之情多。痛飛仙之
術寡。驅逸思於方外。踟高情於天下。使蓬瀛可得而
宅焉。何必懷此都也。亂曰。已矣哉。吾誰欺。林壑逢地
煙霞失時。託宇宙兮無日。俟鸞虬兮未期。他鄉山水
祇令人悲。去縣五里內。則爲火烽山。通志云。諸葛
武侯嘗于此置烽火。十里內。則爲犁刃山。李膺益州

記云山長八里高出眾峰形如鐮刃 爲牟谷宋史
牟煥中江人隱居讀書躬耕而食人勸之仕不可嘗
有詩云日中還有昃月盈還有缺我心比日月晝夜
常皎潔鑿石龕藏書銘之曰龕虛其中惟書之容忍
枵爾腹萬卷而足此山峩峩人龕相磨書傳世久永
親以壽至今名其地曰牟谷 一舍內則爲覆船山
十道錄云堯時洪水州人維舟泊此覆于樹下因名
覆船山又名泊山益州記云覆船山中十五里有七
里坂一名羊腹坂屈曲壁立難昇之路 百里內則
爲銅山昔漢文帝時鄧通采鑄之所後立銅官大烏

山小烏山大鄴水小鄴水皆出于其處也 寰宇記
云大飛烏山高二里周迴二里又有小飛烏山高一
里周迴二里重巒峻削兩山相向如飛鳥之狀隋唐
飛鳥縣鎮皆以此名又云鄴江源出銅山赤岍卽故
鄴王城也流至飛鳥合眾流入江小鄴江源出蓮池
鄉小山下東流六七十里合鄴江王勃飛鳥縣白鶴
寺碑云白鶴寺者蓋菩提寺之遺址梁武皇之所建
也憑絕磴以圖規俯長溪而作固神明攸宅駕日月
以長驅鸞鳳知歸撫雲霓而上出

遂寧縣

德陽舊壘石山名區初由縣而郡後乃以節鉞雄矣
英華所載岑文本冊遂州都督彭王元則文使持節
督遂普果合四州諸軍事兼遂州刺史銜 白居易
行刺史李繁制云遂居蜀之腴劉儀鳳南樓記平原
沃野貫以涪江氣象寬舒爲東蜀之都會李石賦云
山維東蜀如連如伏此貞觀之所以建督府而我宋
之所以壯龍邸也水控內道或正或譎此劉裕之所
以榮譙縱魯奇之所以抗董孟也 按五代史孟知
祥兵圍東川唐節度使夏魯奇死守檄諸道文有城
如斗有壁如金此之謂也知遂州軍事李駒忠節廟

記略云方董孟連衡稱兵十萬突次明月池而公以
騎卒二千勢不相軋乃堅壁清野坐困強敵始自戊
寅迄于己巳不幸食盡勢窮義不苟生背裂血面竟
以死謝駒守是邦追維前烈遂度地于東城之隅建
廟請額刻之堅珉以風來世本志稱遂寧治後有忠
井卽故節度夏公魯奇死所每晴明霞彩上浮 陳
子昂遂州南江別諸親故詩楚江復爲客征棹方悠
悠故人憫追送置酒此南洲平生亦何恨夙昔在林
丘違此鄉山別長謠去國愁賈島處州使君改任遂
州因寄贈云庭樹幾株陰入戶主人何在客聞蟬鑰

開原上高樓鑲瓶汲池東古井泉趁靜野禽曾後到
休吟隣叟始安眠仙都山水誰能憶西去風濤書滿
船鄭谷將之瀘郡旅次遂州遇裴晤謫居於此話舊
淒涼因寄二首云誰解登高問上玄謫仙何事謫詩
仙雲遮列宿離華省樹蔭澄江入野船黃鳥晚啼愁
瘴雨青梅早發中蠻烟不知幾首南行曲留與巴兒
萬古傳又昔年共照松溪影松折溪荒僧已無今日
同思錦城事雪鋪花謝夢何殊亂離未定身俱老騷
雅全休道甚孤我拜師門更南去荔枝春熟向渝瀘
范成大遂寧府始見平川喜成短歌云峽之西遂之

東更無平地二十里惟有高山三萬重不知誰人鑿
混沌獨此融結何其工我本吳江弄水月忽來踏徧
西南峰不知塵界在何許但怪星辰浮半空直疑飛
入蝶夢境此豈應有行人蹤今朝平遠見城郭云是
東川軍府雄原田坦若看掌上沙路淨如行鏡中芋
區粟壠潤含雨楮林竹徑涼生風將士驩呼馬蹄快
康莊直與錦里通半年崎嶇得夷路一笑未暇憐飄
蓬 松柏之石昔著貞堅桃李之村今猶爛熳按輿
地紀勝云宋建炎間轉運使衙後圃有松石外猶松
柏而中化爲石又云近郭東北有村三十里許彌望

皆桃李春時盛開爛熳如錦綺郡守春日講出郊故事於此 碑目云蜀安國寺有碑在遂州羅城外永平二年立石 志云城南報恩寺前有白塔一名白塔院舊傳隋煬帝公主隨夫謫蜀而建此塔中藏舍利一粒大如櫻桃今寺廢塔存歲有鶴來巢其頂宋改今名 寰宇記云梵雲山者三面懸絕東臨涪江西枕落星池志云在縣南三里 又云東二里雲靈山與尋香山相連有飛來石二挺立巖隙有唐人呂巖張九宗詩按尋香山本名血腥山唐刺史白子昉改今名 碑目云縣東七里靈泉山壁間鐫七泉二

字東坡筆王象之云隋開皇中靈泉山大霧晦暝三日始散忽有釋迦石像立其所遂建聖佛寺卽資聖院也方輿云資聖院在小溪靈泉山孫諤詩四山藏一寺方丈壓諸峰回首坐禪處白雲深幾重 紀勝云廣利寺在縣西五里巖壑之勝甲於一方雲廚之供香聞隔宿唐建中初建爲善濟院天祐改元爲再興寺宋乾寧爲廣利寺國朝爲廣德寺開山克幽禪師詳見高僧傳中本志云宋釋者交易壁山人惟靖閬中人俱入廣利浮屠說法爲第三第四禪師矣予以壬子歲過之遍摹碑刻有唐觀察支使朝議郎

檢校尙書工部員外郎兼侍御史柱國賜緋李仁表
撰敕賜遂州再興禪林寺記天祐改元甲子特進榮
祿大夫禮部侍郎同平章丞相事侍御柱國賜紫鄭
綮行牒 宋元祐五年守普州知安岳縣事趙嗣業
撰大唐克幽禪師塔記併書篆 元豐八年乙丑金
陵清谿達叟李回爲廣利寺文易記碑 紹聖元年
七月辛亥向眞淨禪師煮茗此上南昌黃庭堅題
尙書省牒奉敕賜善濟塔崇寧二年癸未勅戶部尙
書右僕射蔡京行牒 提舉榮州軍事推官馮世雄
撰遂州廣利禪寺善濟塔碑瀛州防禦推官知湖州

武康縣事充轉運司管勾帳司張康時書篆梓州路
轉運司勾管文字賜緋孫詔通判遂州軍州兼管內
勸農事權勾軍州事武騎尉賜緋何修輔梓州路轉
運判官飛騎尉賜緋許安石梓州路轉運判官兼提
舉學事飛騎尉謝瑾崇寧二年癸未立石 尙書省
牒奉勅宣賜圓覺慧應慈感大師牒至准勅故牒參
知政事鄭均右丞相 缺 乾道九年十二月御寶 又
有崇寧甲申大師忠惠秦國公何東劉懷遠詩云大
士難知何代人克幽開創實艱辛細思筋骨相連理
元是金剛不壞身廣利月華千古皎補陀潮水四時

新可能得悟如來意使我靈臺不染塵慶元丙辰二
年中書省參知政事何澹題云王事勤勞來去忙征
鞍暫歇叩禪房幾經劫火福田故一入禪林心地涼
塔下久藏金鎖骨嶺前長放玉毫光石頭地滑人難
到我欲趨參問大方寶慶丙戌僧隆粲賡云纔過溪
橋眼力忙重重樓閣擁僧房千巖秀色諸緣斷一井
清泉萬劫涼山上玉毫朝現瑞塔中金鎖夜垂光補
陀殊勝歸南海誰信飛來墮此方慶元四年戊午四
川都大茶馬官丁逢題云出城數里卽青山路入蒼
松白石間只合步行尋曲徑不宜呵喝入松關 碑

目云縣西長慶院有浮螺亭又有卞高五十六體篆
字碑 志云眞如院在東南十五里唐咸通中建石
壇上有大寶幢高二丈餘刻西方神咒又倚山起屋
鑄石爲佛凡佛龕一百儀仗三千 又云北二十五
里蓮華寺一名崇善院隋袁使君別業也其相近法
寶寺一名妙臺宋陳志剛文彥修遊此有碑云自城
中來飲切虛堂歲晚江寒極目烟靄罷倦欲登妙臺
更索照上座茗椀乃去 寰宇記云龍頭山在州東
五十里山有石勢如龍頭唐乾元二年奏置龍歸寺
又云龍池寺故老相傳池側有柳樹大十圍周武

帝天和初有龍自樹下升天士女共觀之自龍升後其樹乃枯池亦淺竭 志云南五十里有花板寺元憲宗入蜀在此寺中生一子名辦都尋卒于此後每遇天雨陰晦見太子着赤袍行水上鄉人以爲神遂刻像立祠祀之 志又云大佛寺在縣南一百里卽古定明院□□□□南唐咸通中建前依巖石宋治平間賜額定明其崖上有石佛首靖康丙午道者王了知命工展開身像高八十尺下俯江流寺前有石壁立色如黃羅故俗名黃羅帳其左有石磴緣巖人撫掌則鳴其聲如琴又有合掌石石左右向宛有

指爪介於湍流中 方輿記云東蜀道院在郡治內晁子西爲記碑目云唐張九宗題記在城東崇元觀其字圓勁有虞褚風骨 本志云東十里嵩山觀有唐呂巖詩云兩日行山興尙稠塵緣未斷且回頭一天風雨吹涼閣四面藤蘿伴客留着眼盡難爲業障平生無過是浮漚何須抵死言名利尋得清閒卽便休 寰宇記云鶴鳴山在城東北二十里上有古觀松上嘗有鶴唳 志云集虛觀在城北二十里廣山山極孤峭斗入江心涪江鄴水會其下下有龍潭山常動搖有銅鑄明皇像殿柱上有葛瓚題字削之愈

明絕頂有葛仙洞碑目云遂寧廣山葛仙翁洞上有
殘碑紀詩云几字江頭鎖翠烟一峰插立已參天我
來直上無人識贏得清閒盡日眠一云城東八十里
有崇真觀在白鷺山巖腹乃周隋間葛仙翁煉丹之
所輿地紀勝云遂寧有上清觀祀董上仙像上仙
唐小溪縣民女也神姿雅異一日紫雲垂布于庭天
樂青童引之上升父母號泣呼之復下開元中詔迎
入關乞還未久竟仙去詔置像于上清觀志云又于
此地建唐興館今唐興觀是也入蓬溪界已上山川
俱見寺觀中

鹽亭縣

趙徵君蕤此縣人習術數之學隱居不仕著長短經
李太白往訪之縣有濯筆溪云太白從徵君習書處
也廢永泰縣文同與可生于其鄉丹淵集有北橋記
自敘邑令郭君經請于其邑人文同者又有永泰劉
令清曦亭詩云木杪照初日捲簾知曉晴軒窗無限
思圖史有餘清露下濕花重風來泛竹輕何須嫌五
斗持此謝淵明與可有夏日閒書墨君堂壁詩云
先人有敝廬涪水之東邊我罷漢中守歸此聊息焉
是時五六月赤日烘遙天山川盡慘燥草木皆焦燃

塵襟既暫解勝境乃獨專高林抱深麓清蔭密右綿
層巖做戶外淺瀨流窗前邀客上素琴留僧酌寒泉
竹簟白石枕穩處只屢遷忽時乘高風遠望立雲烟
野興極浩蕩俗慮無一絲氣爽神自樂世故便可捐
却憶爲吏時荷重常滿肩几案堆簿書區處忘食眠
冠帶坐大暑顙汗常涓涓每懼蒙深責取適敢自便
安閒獲在茲恍若夢游僊行將佩守符復爾趨洋川
山中豈不戀事有勢外牽尙子願未畢安能賦歸田
其二歸來山中住便作山中人冠帶亦自閒累月不
着身散髮層巖阿濯足清澗濱石蘚黏簡冊松風墮

衣巾鄉里多舊遊不厭過從頻山肴與野釀待我如
佳賓有召卽走赴愛其愛我真常恐禮數乖取問吾
交親正此一夏樂忽茲邁蕭辰還愧擁千騎又走西
道塵此蓋石室先生所居處也 杜甫行次鹽亭詩
云馬首見鹽亭高山擁縣青雲谿花淡淡春郭水冷
冷丹淵集云縣旣官於羣山其修隴茂麓逶迤曼衍
分勢而住爭會于左鯨偃鼇卧尾吻相屬谿溝澗谷
蟠縮破斷蓋荒源野溜瀼湧深激夏澤秋潦相倚爲
暴故郊圻之地少夷陸矣 志云西負戴山則臨梓
潼水從劍門來者隋張峻夫祠在焉東潺亭山則臨

鹽亭水從閬州來者隋董叔祠在焉 寰宇記云負戴山一名高山廢高渠郡城也其山龍蟠虎踞出劍門入當縣起伏四百餘里至此而蹲山有飛龍泉噴下南流入梓潼江水色清冷其味甘美時以爲瓊漿水也嚴氏功德碑云山南西道節度使移興元尹震震弟山南西道移東川節度使礪二墓俱在負戴山下 神異記云隋張峻夫遊蜀至鹽亭遇一老嫗泣問之嫗曰地有井蟒每歲祭以男女方汲今輪次當以某男女祭峻夫聞之愕然許以除害次日縛男女致祭蟒從井出將噬峻夫卽杖劍投之蟒遁山洞滅

迹峻夫登山洞口封以巨石書紫微仙洞四字蟒害遂除上帝命主此山爲神至今血食 寰宇記云董叔山在縣東九十步高一里隔瀾江水孤峰絕島峭壁千仞舊名潺亭山隋開皇四年縣令董叔封嘗遊宴于此後人思其德政號曰董叔山十道記曰董政山隋開皇中縣令董叔封高雅之士去官之後民咸思其德因指此爲董政山 寰宇記云鹽亭水源出閬州西水縣西南流入當縣鹽亭井故名鹽亭水去合梓潼水也 碑目云李義府碑在永泰縣北寰宇記云義府本此郡人武后時爲中書令後人立碑以

旌餘烈真德秀云李義府奸臣也其子湛以忠義聞
若湛者可謂能蓋父之愆已

安岳縣

寰宇記梁普通中義州刺史臨汝侯賜羣獠金券鏤
書其文云今爲汝置普慈郡可率屬子弟奉官租以
時輸送此立郡縣之始也 普州三亭文同皆有詩
一曰均逸亭詩云亭宇跨城端新苔磴道盤風光
水石烟景暮林巒簿領仍多暇賓從每盡歡何由
塵鞅聊問借闌干一曰東溪亭詩云短笻逶迤渡
欄天矯沈波光環堵淨日色綵梁深萍荇翻金鯉

茗起翠禽主人公事簡時此照清襟一曰碧崖亭
云斷巘綠溪邊危亭翠壁前軒窗誰是客詩酒自
仙遠壑春藏雨長波晝起烟吏人休報事高興
然圖經云城東南大成山世傳孔子經宿于此
碑又云安岳城南樓杜老教授其上所爲南樓
聲是也 唐蘇絳賈島墓銘序云島字浪仙范
長材開氣超卓挺生屬思五言孤絕之句記在人
雁訪責授遂州長江主簿自長江簿遷司倉參軍又
遷普州司戶參軍終焉有祠在城南三里碑目云此
碑以會昌四年立馮賢書又云唐宣宗大中八年賜

浪仙墓表曰於戲有唐詩流賈君之墓志云賈島墓在城南三里安泉山卽田家嘴也 集古錄云唐紫極宮碑樂闡撰賈島書樂彥融篆額立元皇帝祠也碑以會昌元年立在普州 又云唐西巖禪師受戒序普州刺史韋忠撰開元十年建又云唐開元觀老君應見碑開元三十九年岳陽郡奉勅建大宋淳化二年重鐫又云唐棲崖山寺贊銘開元戊辰前刺史宏農楊珪博陵崔克讓書刺史房公刻于山之石壁半已剝落 志云鍊山者縣治之所枕也一名鳳山後二里曰大雲山方輿云鳳凰山在郡治後形

飛鳳福濟寺居其頂舞鳳亭當其嘴州治據其脊左爲慈氏院右爲白馬廟延袤數里氣象雄勝唐獨孤及詩云雁陣起秋雲雞聲滿林屋客思不可禁鍊峰駐雕轂者此也方輿云鍊山神姓姚諱萇字景徹隋文帝時普昌瀘三州夷作亂帝命神爲都統將兵討平之卒葬韓朋鎮石城山後人爲立廟嘉定乙卯紅巾作亂於益昌遂入普屯于廟山是夕暴風雷雨掀揭寨舍渠魁莫簡見空中神異謁廟謝過探籤得擒賊先擒王之句已而就擒志云有司每以十月十七致祭其誕日也 方輿云大雲山在鍊峰門外二里

有棲巖寺卽李洞讀易處洞雍州人避朱泚之難入蜀於大雲山鑿石爲洞讀易其中嘗師事賈島鄭谷哭進士李洞詩自聞東蜀病惟我獨關情若近長江死想君勝在生瘴蒸丹旆濕燈隔素帷清墳樹僧栽後新蟬一雨聲 方輿云岳陽溪在安岳縣天聖中郡守彭乘鑿石爲曲水後名翰林灘每歲修禊事於此雙溪在郡西七里與岳陽溪合而東按乘益州華陽人爲漢陽軍判官願望鄉閭悵然曰親老矣乞歸侍養寇準薦之召爲集賢校理求侍親得知普州舊制蜀人不許赴蜀官特恩自乘始慶曆中與歐陽文

忠宋景文張文定同在翰林今東溪上曰翰林灘者公遺跡也 志云岳陽溪卽青竹溪又云南二里響水潭爲岳陽溪上流上下皆石水觸之聲如金鼓其洩如倒其澄如沚 本志云破石井在城西其水清冽乃一巨石鑿開而得水云陳搏相地所開按李宗諤圖經謂陳搏字希夷普州崇龕人旣長辭父母去學道或居亳爲亳人或居洛中爲洛人或居華山爲華山人舊普慈志云鑿山棗崇龕梨天池藕三者皆希夷所種也 方輿云良巖在岳之清流鎮杜孝巖嘗書艮卦彖辭其上又作杜氏寶田銘云昔我皇祖

節範處士實居谿上題于石壁云忠孝二字吾家之寶爲我子孫留此基銘舊屋改矣谿山自如面溪背山新構吾廬山巘石壁可以大書乃作斯銘毋忘厥初銘曰忠孝之寶出爾性天忠不待貴葵藿有尊孝不待富菽水盡歡苟能保此旣美且安經史之田在爾菑畲穗穆是植稂莠是除苦心立志斯爲良圖雖有饑饉必有豐餘光明之山韞玉初露卜築山根寶田所富此山不磨此寶長明此山不滅此田長畊環堵旣新勒山爲銘子子孫孫生成成按杜孝嚴官至禮部尙書史稱安岳杜孟游太學見童蔡用事翻

然引歸所謂節範處士也 志云馮公墓碑在棲岩山字多剝落名不可攷按諸馮自唐馮宿之後爲彰明令因家于蜀在普有南宗北宗之別南宗有馮如晦能辨范純仁之誣獄馮宋與陳東同伏闕上書北宗則有馮光猷能戒大將楊瓊之殺降馮澥之忤蔡京遭貶皆著名當時

樂至縣

樂至池卽治內池也寇萊公爲縣令嘗讀書於此又有蓮池一名洗馬池舊傳勾侍郎所鑿 治南有洞石刻小盤谷三字見存而龍洞龍潭皆可以禱雨此

通志所載

蜀中名勝記卷之三十

校讎臆言

謹按校讎之法有二一曰求真一曰求是蒙謂
 校古本宜求真校今本宜求是校者不敏竊附
 後義但此記徵引書目不下二十餘種又旁及
 故老軼聞蓋記體而兼野史之性質也除正史
 雜史外幾於無書可考間有散見於各家筆記
 者又多詳略互異若據正史雜史以盡改野史
 必為通人所嗤篇中據國志改者一如一卷十
頁陰面
 九後轉置犀牛二頭一頭在府市市橋門原文
後轉
 犀牛二頭在府犀牛二頭在府
 中一頭在市橋犀牛二頭在府
中一頭在市橋據通志改者一如八卷十五頁
陰面八行

黃帝陰符碑在州城至道觀咸通十五年邱冲

書原文二句倒有可兩存者如十二卷二十三花欽

字敬定杜甫詩作花卿字驚定有應衍未衍者如二十七卷

面一今南城坪是也原句上多今江北府城今

十九頁陰面六行古定明院原句下多在遂甯縣五字有不必改

以存其真者如九卷三頁劉禹錫九鄭澣通志

互有缺文應補者如八卷六頁東南有雁卷十五

頁陰面唐人岑嘉州別業岑嘉州詩曰原缺六

十三卷十九頁每歲邑人遊於原每歲作歲有脫

文擬補者如六卷五頁曰北口原脫北字又十

行其名曰笮用二卷四頁陰面七行李膺笮橋

聖靈宮賢妃原缺聖字有知有脫文不敢擅補

加九卷二十一巴蜀謠曰譙登治涪城文石

張羅守合水巴底那得原脫以上各端

系然原本久失此從邵氏鈔本校刊陶

陰帝虎曷可勝言行款之間用雙行者皆脫文

用空白者皆衍文也至字有古今通假替代一

仍其舊雖冒駭俗之譏所不恤焉

此處有若干行文字，因紙張嚴重損壞及模糊，內容難以辨認。依稀可見「...文...」等字樣。

後跋

曹能始先生以名進士官四川久於山川形勝金石古蹟知之最審成蜀中名勝記三十卷搜討繁博削盡支蔓可以補志乘之闕甚多酈氏水經注後似此作罕矣舊刻不知何年燼滅近得道光朝邵氏手鈔本雖間有訛舛篇頁尙完知所徵引確爲傳寫之誤者加以訂正不知者或知而客中書籍無可供考證一仍其舊付諸手民記問譎陋不敢輕下雌黃也先生所著聞尙有秦中名勝記未見刻本尙不知何年得與此書並流布於天壤是則企望於家富收藏有

福讀書者矣助讎校者歸安徐元芝遵義趙棟安陸
施子珩例得附書

宣統庚戌仲秋山陰周肇祥跋

是書有遵義府一卷遵義本隸四川自 國朝雍正
六年始改隸貴州省今刻仍之以存古人面目肇祥
又誌

古蹟賦之類書中各領頭三十餘時信譽則
曹節欲求士以各職士官四川人然山川沃壤金百
餘題

件繫者山水郡邑挈其紐紀事紀詩文燦如文在手
又如絲就篋尋端免勞糾詞不取己出一一註誰某
成爲一家言卻非攘人有有時加按語立論堪不朽
對山志武功體例差足偶先生媿雅材宦游蜀中久
廣記目臚十此獨不脛走治行定可傳頌溢輿人口
積資得升階參議歷廣右無端中闈禍削職饜藜糗
終焉詔起復拜疏辭不受家居二十載尼會遘陽九
其死重山岳 以上見明詩別裁小傳 其書寶瓊玖慷慨緬前喆
一讀一低首雕本縱云亡幸未覆醬瓿借鈔得足本
邵子意誠厚不知秦中記尙有存焉否 聞先生尙有秦中名勝記

道光元年六月
金山周
蘇
題